

每週經課朗誦經文(巴克禮台語漢字)2014/04/13

共同經課 - 1

以賽亞書五十五章四節~九 a 節

4 主耶和華賞賜我受教示者的舌，互我知怎樣用言語扶助厭倦的人。主逐早起叫醒，叫醒我的耳孔，互我會聽，親像受教示的人一樣。5 主耶和華開通我的耳孔；我並無違逆，亦無退後。6 人拍我的尻脊駢，我出在伊拍；人掇我嘴嬾的嘴鬚，我出在伊掇；人凌辱我，給我呷涎，我亦無掩面。7 因為主耶和華的確幫助我，所以我無見謫。為著按呢，我互我的面硬親像颯石；我亦知我的確無致到漏氣。8 稱我做義者近啦；是誰及我相爭，伊通及我相及倚；是誰做我的對敵，伊通就近我。9 看啊，主耶和華欲幫助我；是誰會定我有罪啊？

共同經課 - 2

詩篇三十一篇九節~十六節

9 耶和華啊，我佇患難中，求你憐憫我；我的目矚因為憂悶拍歹，我的心神我的身體亦是按呢。10 我的生命因為憂苦來消無；我的年歲為著吐氣亦按呢。我的氣力因為我的罪惡來衰憐；我的骨頭亦枯焦。11 我因為我一切的對敵成做凌辱，佇我的厝邊兜閣卡傷重；許個識我的人攏驚我，佇外面看見我的人走閃離開我。12 我親像死人，互人袂記得，無人數念；我親像破碎的器具。13 因為我聽見多人的誹謗，四圍攏是驚惶；in相及參詳攻擊我的時，就計謀欲害我的生命。14 耶和華啊，我猶原倚靠你；我講：你是我的上帝。15 我的遭遇佇你的手；求你救我脫離我的對敵的手以及窘迫我的人。16 求你互你的面照光你的奴僕，照你的慈愛拯救我。

共同經課 - 3

腓立比書二章五節~十一節

5 恁著有基督耶穌的心做心：6 伊本有上帝的形狀，無掠及上帝平等做所著執守的；7 反轉傾空家己，取奴僕的形狀，成做人的樣相；8 已經有親像人的款式，就屈家己，順服到佇死，甚至死佇十字架。9 所以，上帝高升伊極高，賞賜伊彼個名搬(pôaⁿ)過佇萬名的頂面的，10 互見若佇天、佇地，及佇地下的，佇耶穌的名無一個腳頭窩毋跪拜，11 無一個嘴毋稱呼「耶穌基督做主」，來歸榮光父上帝。

共同經課 - 4

馬太福音二十七章十一節~五十四節

11 耶穌倚佇總督的面前；總督問伊講：「你是猶太人的王嗎？」耶穌給伊講：「你講就是。」12 伊互許個祭司頭長老告，伊也無應。13 彼時彼拉多給伊講：「許個人干證你到許多項，你無聽見嗎？」14 耶穌無應伊一句話，致到總督大奇怪。15 到節期總督照例放一個犯人互眾人，是照 in 所愛的。16 彼時有出名的犯人名叫巴拉巴。17 in 已經聚集，彼拉多給 in 講：「恁愛我放是誰互恁？是巴拉巴？抑是稱做基督的耶穌？」18 因為知 in 為著怨妒才解送耶穌。19 伊坐堂的時，伊的某差人給伊講：「此個義人你毋通干涉著，因為我今仔日佇眠夢中為著伊多多艱苦。」20 諸個祭司頭及長老教唆眾人，求放巴拉巴，滅耶穌。21 總督應講：「此二人，恁愛我放叨落一個互恁？」in 講：「巴拉巴。」22 彼拉多給 in 講：「按呢，就稱做基督的耶穌我著怎樣辦伊？」in 攏講：「釘伊十字架！」23 總督講：「怎樣？伊有行甚麼歹？」in 大聲喝講：「釘伊十字架！」24 彼拉多看見無採工，反轉愈擾亂，就捧水佇眾人的面前洗手，講：「佇此個義人的血，我無罪，恁家己打算。」25 百姓攏應伊講：「伊的血歸佇阮及阮的子孫。」26 伊就放巴拉巴互 in，已經鞭拍耶穌，就發交去釘十字架。27 彼時總督的兵帶耶穌入公堂，聚集通營圍伊。28 褪伊的衫，將紅袍給伊穿，29 用荊仔編冕旒，戴佇伊的頭殼，用蘆竹下佇伊的正手，跪佇伊的面前戲弄伊講：「猶太人的王，平安！」30 就給伊呷涎，抬彼枝蘆竹來搾伊的頭殼。31 戲弄息，彼領袍就給伊褪起來，將伊家己的衫給伊穿，帶伊去，釘十字架。32 出來的時，抵著一個古利奈人名西門，勉強伊相及去，互伊夯耶穌的十字架。33 到一所在名各各他，就是「頭殼碗」的所在。就用苦膽所調和的酒互伊飲；34 伊試看，就毋飲。35 已經釘伊佇十字架，就做鬮分伊的衣服，36 閣坐佇遐顧守伊。37 就下斬條佇伊頭殼的頂面，寫講：「此個是猶太人的王耶穌。」38 彼時，有二個賊及伊同釘佇十字架，一個佇正旁，一個佇倒旁。39 經過的人譏刺伊，搖頭，講：40 「你毀壞殿，三日閣起的，著救家己！你若是上帝的子，著對十字架落來！」41 許個祭司頭及經學士以及長老也是按呢戲弄伊，講：42 「伊曾救別人，袂會救家己。伊做以色列的王，今著對十字架落來，阮就欲信伊。」43 伊倚靠上帝，上帝若歡喜伊，今就著救伊；因為伊講：『我就是上帝的子。』44 及伊同釘彼二個賊也是按呢罵伊。45 對日中晝到三點，遍地黑暗。46 差不多三點，耶穌大聲喉叫講：「以利！以利！拉馬撒僕大尼？」就是講：「我的上帝！我的上帝！你啥事放離我？」47 邊頭倚的有人聽見就講：「伊啲叫以利亞！」48 中間一人即時走去，提海絨浸醋，繕佇蘆竹仔尾，互伊吸。49 其餘的講：「且慢，看以利亞來救伊抑無。」50 耶穌閣大聲喉叫，就斷氣。51 忽然，殿內的帳對頂到下裂做二旁，地動，石磐裂，52 墓開，已經啲暈的聖徒，in 的身軀多多起來，對 in 的墓出。53 到耶穌復活了後，in 入聖城，出現佇多多人。54 百總及相同顧守耶穌的看見地動及所經過的事，不止驚，講：「此個果然是上帝的子！」